

Der Medwescher


TRAMETER

Det Saksesch Blied der Medwescher Himetgemeinschaft

Nr. 23 am 12. Johr

Bäluöch zem „Mediascher Infoblatt“

Nürnberg, am Juli 2016



Alle Zeichnungen am Blied
se vom Untch Wolfgang

Der »Medwescher Tramiter«

De »Medwescher Tramiter« gidd et nea schiun sät iwver zäh Johr!

2005 huët Günther Schuster än als Bäluëch zem »Mediascher Infoblatt« begranjt uch betroat en sät diëm uch redaktionell.

Der »Medwescher Tramiter« äs nea esi ze son sät iwver zäh Johr af der gaonze Wealt de inzich rejelmäßig erschengän Publikation än easer saksesche Sproch.

Bekun huët hië senge Numen vum Tramiter (Trompeter), die fräher hiu iuwen af sengem »Tramiterturm«, dem Wohezichen vu Medwesch, iwver de Jahrheangdert seng, fiur de Stadt enorm wichtich, Arbet verricht. Hië hadd vun do iuwen äm Turm en geat lwersicht iwver de Stadt bäs def än de Ämgiëwung änen und keangt esi schniël erkennen watt ä senger Stadt passiert, of zem Bäsäll bäm Sonjen ener Krämm det Feer aft Heos iwvern sprajnt, odder wonn irjendär Hallodris de Stadt iwverfalle wulen, gaof hië mät senger Tramit Alarm. E most derbä net sajnderlich musikalesch sen, hiftsach leokt. Esi wor der Tramiter der Beobuëchter, Wächter uch Warner senger Stadt, die genä erkenne moßt wanni uch wä hië ä seng Tramit ze blose huët.

Eas Tramiter, det Bliët alsi, verstiht sich sealwest gaonz än deser Tradition als en satiresch/humotistesch Plattform zer Fliëj uch zem Bewohren easer sakseschen Sproch, dem »Medweschereschen« Dialekt. Dialekter messen bekäntlich net nor gefliëcht wärden, sä messen, wo se iwerliëwe weallen sich uch un geändert Zegden upassen, awer uch wegterentwäckeln kennen, sonst lufe se Gefohr kenif der Hiusproch de Kerzere ze doasen uch eoszestärwen.

Det Rezäpt derken ze wirken äs sihr ifach! Em nit:


Zegtlusen Humor mät hegdijjer Satire (odder ändersch ämeränk), mäsch Bäräch ä »Noasaksesch« dreangder, benätzt wenich »diakritesch Zichen«, damät em bäm Liësen niche Knodden äm Hern bekit uch verzährt alles mät genial, pointieren Zichnungen vum Wolfgang Untch (Lulä).

Eas »Dialekthäder« bidde mer un deser Steall äm Verständnes, awer der Erfolg hellicht jo bekaontlich de Mättel und die hießt: »Medwescher Tramiter«.

Schwarz Vision

Ir Legt, ech hat' en lichten Drum,
ech steand fiur enem griuße Bum
drun heng der Wätz uch Schärz half diut,
de Komik zappelnd uch gaonz riut,
verseakt mät ärer liëtzte Kraft,
ze schnappen enen Tropen Laft.


En Gräv dereangder, fräsch uch griuß,
"Der Satire sen mir ändlich liuß",
steand auf dem Grävstin fätt geschriwwen.
Wat huët det Laond äm Drum geridden?
Wat saol uch terf em hä noch son,
wä dänn als Chräst des Wealt verstohn?



Wat schwarz äs, mess em farwich läjjen,
sich ständich enem Codex fäjjen,
en Paragraph als Guillotine,
en Chefän widd zer Konkubine ...
Gefährlich äs hië hiu dosiert,
dräm widd Humor baold portioniert.

Zem Glück bän ech dron afgewacht,
Beviur et do noch richtig kracht.
Dann Lachen widd äng zelebriert,
well Gott huët eas esi justiert,
Humor äss kostber Liëwenssänn,
dräm bringen mir den Spaß net äm!

(Slash – der Tramiterfan)



De Mõnraket

Karl Gustav Reich

De Wealt huët, wä et sich gehirt,
 än desen Däjén dién geihrt,
 die ener ärer Greßten äs,
 daot äs nea ister gånz gewäß:
 Hermann Oberth äs seng Nummen,
 wi't net wiß, die sål sich schummen!

Ändern hun ä gläcklich Steangden
 uch vill Nätzlichet erfeangden,
 äm af easer hischen lërd,
 dä es allen läw uch wiërt,
 mejlichst schniël viurwärts ze kun,
 wel mir't alle nidich hun.
 Awer vun der lërd ewech
 fånd noch nemester de Stiëch.
 Dåt eas Hermann Oberth det:
 Hië erfaond de Mõnraket!

E Mäntschitsdrum äs nea erfeallt,
 froa äs der Wiëch zer Stärewealt.
 Em meß et klör ereos ist sön:
 Wonn ener flecht hegt af de Mõn,
 meß hië ängden ä Gedånken
 sich bäm Oberth irscht bedånken!

Båld kån em – wie häw't geducht –
 vum Mõn sich broingen wat em breocht,
 und affen scheßt em dro dä Legd,
 dä glatt net passen än des Zegd.
 Mir Saksen se beseangders stulz,
 datt hië wuß eos Saksenhulz!
 Wat hië der Wealt zicht, wår uch det:
 Ohnen de Saksen giht et net!

Wonn tea nea 75 Jõr,
 kun uch de Saksen, dåt äs klor,
 mät dië villen ändre Mäntschen,
 äm der Geseangd uch Gläck ze wäntschen.
 Wo än der Wealt ku Saksen viur,
 ku se alle hegd zea dir.
 Te sält ålt wården, wä de Keakel,
 wõ tea gespillt und drõ geliëwt,
 wõ tea ohne jed Gefackel
 deamõls schiun nõ'm Mõn gestriëwt.
 Tea sält gläcklich sen, geseangd,
 und erliëwen noch de Stangd,
 wä em drõ mät de Raketen
 erriche kån merwell Planeten,
 ohne sich nõch afzeriëjen,
 ohnen ä Kõpesch ämzestejen!
 Datt uch mir mät kennen fuëhren,
 wäntschen ich noch alleguëren!

E Gläckwäntsich fiur Prof. Dr. Hermann Oberth zea sengem 75. Geburtsdäch

Der Personalchef fröcht den Bewärwer: „Se Sä froingdert?“
 Änfert der: „Noch net, awer ich mächen alles, wat em mer söt.“

Nö dem Fußballspeall strömen alle Legd dem Eosgång zea. Nor der klien Hans krecht iwwer det Geschätz. En Afpasser kreescht en un: „Kåst te net eossegohn, wõ tea eränner ku bäst!?“ – „Dåt mächen ich doch!“

Lihrer zem Schiller: „Enner vun eas zwänneren äs en Trottel“. Nechsten Däch gidd der Schiller sengem Lihrer en Zerrel. „Wat äs dett nea?“ – „En Attest vum Uërtz, datt ich gänz normal bän.“

„Chef, terf ich hegde zwo Steangden fräher Schlass mächen? Meng Frä weall mät mer shoppen gohn.“ – „Kitt net ä Fröch, Schulz!“ – „Hischen Donk, Chef. Ich wasst, se wedde mich net am Stäch lossen.“

(Ägescheackt vum Wilfried Römer)



Ech sot: BUUUH!!

IMPRESSUM:

Der MEDWESCHER TRAMITER verstiht sich als e Bliéd zer Verbridung vu Froad uch Spaß än easer sakscheschen Motterspröch!

Ereosbroinjer: Himetgemeinschaft Medwesch e.V.; Der irscht Chef: Gökeler Alfred (Freddy), Balingen

De Steallvertriëder: Buresch Horst (Mick), München, Ortwin Rill, Recklinghausen

Redaktionskollegium Medwescher Tramiter: Schuster Günther, Nürnberg (veräntfertlich) Sankt-Gallen-Ring 198, D-90431 Nürnberg, e-Mail: hg-mediasch@kabelmail.de, Dr. Drotloff Hansotto, Alzenau, Römer Wilfried, Augsburg, Untch Wolfgang, Talheim

Layout: Untch Wolfgang, Talheim; **Mätarbeder & Logistik:** Buresch Klaus.

Erschengd än: Närrembrich (Nürnberg); Wä oft?: iest oder zwiëmol am Johr als Bälüech zem Mediascher Infoblatt (awer nor wo genaech Legd, geneach Bädträch äschäcken).

Dreack: Digitale Medien GmbH, Heilbronn

Schräftlich Bädträch bitte un de Redaktion schäcken. Numentlich oder mät em Signum gezichent Bädträch steallen de Minung der Verfasser duër und messen net mät diër des Ereosbroinjers iwerinstämmen.

Det Bliéd äs ämsonst, awer mer wedden es froan wo Sä eas mehrnor ewenich eangderstätzen, et mess net eabedainjd Giëld sen, awer vill Bädträch. Of des nea sealwest geschriwe sen oder irest feangden, äs allesint.

Bankverbainjung: Sparkasse Fürstenfeldbruck, Konto: 13 04 393, BLZ: 700 530 70,
 IBAN: DE81 7005 3070 0001 3043 93, SWIFT-BIC: BYLADEM 1FFB